

江左校士錄

貞

天馬山銘

科取松江閩屬古學二名 趙世修上

天馬山者在華亭縣西北一名機山其下有村曰平原之村地志以為故晉平原內史陸機之村焉斯山也危峯
雲竦出羣表狀若奔馬昔嘗怪漢世野人得渥洼之產附會神怪天子欣然窮不貲之費力文儒墨卿黼黻雲漢
色嘉瑞豈如茲山於大海之濱攬千里之勢可以規嶮阻審利害發蹤指示制窮夫之死命者也山川至博古其
頗有銘頌若董仲舒王升之作昭曜乎今茲而石帆仙室麥積崖諸僻微之區亦有文辭可誦若此山固不為今
者矣為之銘曰 十上天關七盤霄際東道恆循昆命愁逝呼友追龍乘閭謁帝房宿徒空置思變是則矣孫生
焉如削畏趨天河疑騰井絡江海入窗雲霞一素走鹿在胎遁鱷懸縛龔龔遊龍青宮不冬抗旌峙嶽頓響何峰出
高明月盡拜芙蓉

一序甚有漢文氣息銘亦雄秀

恆山寺獨輪銅車銘有序

科覆徐州閩屬古學五名 魏 渤 睢 甯

徐州府志成化間提督徐州倉太監韋通於恆山寺鑿井得獨輪銅車一色綠如瓜皮洗而視之上有識文陸機造
三字重三十鈞推之輪轉可行進於朝云秦漢以來範銅之物近世搜出土中者頗多若鐘簋敦尊龍虎鹿盧鐙雁
足鐙弩機虎符鏡刀鉤泉範諸物尤不可悉數士大夫癖此者或千里從拓一二紙以為寶貴取其文以駁證經傳
釐訂文字雖真偽不一要其因好而感理固爾也夫胡公棺字春申墓銘款識之文末盡可據獨此車以九百斤之
重而有獨輪之危不十人行之必其能自運以趨者也豈今世所謂機器當時已有之或雖成而不可行行而不適
於用若今世汽船之類耶抑爾時闢鑿之輩偽造古物因緣以欺上而紀載者或姑存其事而不深考也因追為之

銘曰。陸氏作車。魯太康。凍治善銅。出丹陽。左龍右虎。翼我傍。巧工鏤刻。成文章。恆山有井。深莫藏。千年得之。獻帝皇。平原內史。何堂堂。朱輪赤旂。吁可傷。

序因事成規銘造語古秀

鎮南閣銘

甄別南菁書院特等一名 劉毓麟 常州府學

自憑祥土州。迤西南十里。嚴關當其衝。羅陀交躡。鳥道百轉。側趺陟隘。怒蹙若墜。夾雄屯衛。森詰言服。逾垵百步。荒菁糾途。華任中分。窺阻萬重。文淵諒山。驕氛軼前。龍州恩陵。勁壘扼後。雖奇嶂摩天。黝礪嶙淵。而胡蟲夜合。風鶴時慄。昔夢陽入蜀。灑翰劍閣。今瘴躡象突。島腥纏張。寤繫南服。鑿鏡儻振。敢武前哲。銘石永禩。坤維徂炎。鬱林大荒。迺互龍編。巖關皇皇。左扼把口。右跨那校。甕邏襟帶。榛莽踈踣。曰鎮南服。梧墟之屏。九泥闢擊。丕揚天聲。昔在新息。策軍浪泊。橫彗濤霧。銅柱岬岬。又聞擅和。撫景憲鋒。銷斫金貝。來庭扶龍。海氛歛騰。敢怒上國。虔劉蕃疆。九真而北。燎難原藪。阮鹵黔黎。戎臣奉詔。翦此醜夷。雄麾極微。嚴屯固戶。永保言言。粵有謚寓。

覽其雄翰。怒灑奇情。鬱張固作賦之高材。亦摩崖之巨手。

問志伊尹之所志。學顏子之所學。二語自漢迄明。何人足以當之。

壬午會考優生一名 范 鐘

粵自盤彝南炳。殊勛騰伊水之賢。車服東彰。盛德大無顏之後。上窺千祀。邁績空桑。下越百王。權真陋衡。蓋三五之運。萃臣誕其規模。七十之材。尼聖造其俊傑。非夫英英上士。矯矯天人。詎足備影遜而若符。抗曩塵而無忝者乎。夫語侈治安。則賈生蒙誚。言雜纖緯。則廣川被譏。故知魏晉以還。卑之無論。河汾之業。殆而僅存。唐之興也。巧業如李。郭而管晏不足為文章。如韓柳而性道不得聞。有宋以來。宰相光於良史。道學盛於曩篇。然而運阻見知。賢規近學。

先知先覺。被澤或間於一夫。在後在前。見道未聞於卓爾。豈五百年之作者。炳若日星。而一二士之比倫。浩同河漢。蓋才難自昔。而詣絕於茲也。且夫琨璠蘊德。必昭四燭之光。金石含貞。必挺千秋之質。昔者炎劉運替。機穽興。顧名士於隆中。扶真人於漢上。被服儒者。中道從容。是以抱膝長吟。為邦同乎四代。出師奉表。作訓匹乎三篇。陸宣公事猜忌之君。馭難馴之將。將之以至信。燭之以至明。卒使憂難危疑。懷乎必敬。縱衡險阻。不失其馳。何其神與。若乃遭時差盛。孤詣自持。希文憂樂。鳳翥於吳中。司馬誠明。龍驤於涑水。是以師友所被。游夏無以庶幾。王佐之才。旦望參其位置。洵曠世之碩望。而清時之帝師也。要之志士肝時。哲人握道。處繫躬乎巖壑。行抱策乎乾坤。三聘幡然。則后辟撫其左右。一瓢可樂。則神明諒其幽忱。而或橫議風生。危言雲屬。清談廟略。宰執儒人。將以砥礪前修。頡頏往聖。安見聲香載籍。激宙合之心。期圖畫丹青。識斗山之景仰也。

本曾文正聖哲畫像記立說最為允當文亦雅潔可誦

問志伊尹之所志學顏子之所學二語自漢迄明何人足以當之

壬午會考優生二名

朱銘盤泰興

夫握道千辟。匡拂之義斯光。處陋繫躬。遠性之理攸在。蓋志異卜務。終開績於相君。學攬黃義。必儲經於坐論。故夫三冊之訓。神人亮其隱忱。三千之才。孔聖拔其魁望。若伊顏二聖者。豈非塞六合窮千春。超然而無偶匹者乎。後之賢者。上測往微。綜厥全猷。萃為遠詣。將欲汰鼎鵠之詖說。汲冤輅之宏經。備彰邈於一身。揖華魯於百代。偉詞篤論。著乎通書。誠可謂鏡燭豪英。權衡雋彥者也。夫虬伏山澤。則術貴可庸。驟邁修途。則精期必竭。庶以仰肩帝望。俯眷與忱。滌儒人之諛言。踵往者之遐躅。我儀炎代。備覽羣公。諸葛大賢。殆無愧色。至如有唐中葉。德宗乘乾干戈。謠興海宇。湯沸惟時。運策定計。厥有宣公。觀夫論切事情。言稟道德。蘇氏所贊。誠無過辭。洵乎清時帝師。撥亂聖相。湯氛

戾於噓吸。綜理亂於微茫。方之前修。固當抗迹者歟。過此以往。茲詣闕如。欲求其人。始惟有宋。若夫吳中一范。懷異於華年。涑水一賢。振奇於仕日。庶幾踐蹤阿保。具體顏生。謝騰笑於危言。踵芳規於轍說。韓歐等輩。均所未遑者矣。要之節概之士。錯轅於漢時。空言之風。騰波於宋代。究其流失。往往而同。天下向風。主此奴彼。若四賢者。自非操識宏遠。切理邃深。則夫處踏駁之秋。際夢錯之世。幾何而不行其庭履其聞也。

本曾文正公聖哲畫象記立論最為確當。運以儷詞。其轉折處亦大似六朝人手筆。

門桓寬鹽鐵論有云。異物內流。則國用饒利。不外泄。則民用給。互市以來。財帛外徙。果操何術。以變通之。能舉

前聞而挾其利害歟。

科取上海縣學一等一名 張煥綸

自互市以來。中土利源。為外人所侵。國日貧矣。然竊意五洲地土。莫大於中國。物產之饒。莫饒於中國。人才之盛。莫盛於中國。而坐致此困者。冗費未盡捐。利益未盡展也。試略陳其要。今日靈財者。莫甚鴉片。當事非不燭其害。而溺於厚稅。瞻徇不斷。試思所入之稅。雖多。能敵所出之價。什一乎。聞彼國明理者。亦嘗設會議禁。而我反漠然置之。可乎。宜外乘其機。內嚴其禁。吸種並遏。運販自絕。不特省費。兼可作氣。中外銀貨。向猶恃絲茶棉為挹注。近則業此者亦多折閱矣。推原其然。固由倭印意美諸國所產。漸多且佳。亦由業此者飾偽售欺。貪小失大。漸為外人所疑。因莠累良。強訟霸斷。飲恨莫伸。宜令有司嚴稽作偽。遇有誣抑。悉心平反。信義不虧。利益自裕。亦可補救萬一重農古也。近世逐末愈多。民皆舍田而嬉。且有流入異域。受彼虐侮者。竊意各省荒田甚多。宜悉招令開墾。略參屯田之法。束以部伍。嚴其賞罰。無事為農。有事為兵。裕餉增兵。一舉兩得。既免內地土客之爭。亦免游民流入異域。漢儒言抑商尚已然。政貴權時。今日既不能絕互市矣。而彼之商人。則家家盡力以扶之。我之商人。則有司百計以撓之。無惑乎

彼日富而我日貧也。且大吏以稅捐成數之多寡為稅吏之殿。最因是成風者羅雀掘鼠。商不聊生。舊時殷富十存一二。恐更數年將并此少數之捐而不可得。可不危哉。宜念百姓足孰與不足之義。急挽此弊。明之礦害。由以小人董之。近時司礦務者情同詐騙。皆由委任非人。不得以是咎礦。況設官始見於周禮。近日尤為急務。宜慎簡廉明之吏。審察礦苗。不輕嘗試。審察既的。堅持不搖。勿餒小挫。勿惑浮議。如此寶藏日開。彼將轉而仰給於我。從前已失之富。不難復矣。私鹽之害熾矣。設官以督之。卒以邏之。而仍無益。愚以為今既不能使私鹽盡為官鹽。不如使官鹽盡為私鹽。第令吏稅之釐之。則可省設官養兵之費。而梟販還為良民。盜賊亦少息矣。鈔券本蔽政也。然費不過一紙耳。盈千累萬出於上之口。而無窮救貧之法。莫妙於此。況外人涎我者金銀耳。鈔券一行。外人雖盡括金銀而不能損我中國之富。蓋物產無恙。即鈔券無窮也。惟利所在。即敝所叢。聞外國製券甚精。民不能偽。宜仿行之。凡此皆毛舉大略。有得諸前聞者。有參以私臆者。然今日理財之要。亦莫外此矣。至有建議請貸於民以濟國用者。則不可行也。

孰於古事習於今情。故無迂闊之論。重農政變鹽法二條。更切時用。末言國債之病。尤能洞見中外情形之不同。不宜事仿效也。

問前明鄒期楨輯東林諸賢言行錄。共得十人。以何人為最所錄。言行能撮舉其要乎。

科試常州府學一等一名 劉毓麟

漢不亡於十常侍。而亡於鉤張儉之黨。明不衰於流賊。而衰於樹東林之名。揆之論古。亮失之覈。然顧涇陽標榜後起。俾趨於偽。名心之過。誰其原之。高忠憲格物為本。兼采朱陸。無慙正誼。而激於氣。他若錢啟新抗論相建儲之疏。

薛以身潔垢衣糲食之操許靜餘敦不欺無慚之旨。華燕超厲勇夫毅士之節。顧涇凡劉本儒以劾房喬國縉而名顯。陳筠堂安我素以溉渠救高忠憲而義著。數公者皆以宗社為任。名節為先。客氣乘之。卒遇橫逆。陰晉陽剝。士氣大夷。君子惜其人。又未嘗欲沒其言行也。鄒期楨生際頽亂。冀維謬俗。追軌別哲。取錄舊文。皆殊聞偉行。貞識浩氣。以昭示蒙瞶。勉崇者獻。用心之正。來學有補。然而前之作者。良涉氣矜。後之繼者。復益其猷。使木魅宵灼。燎而焚原。巨蠹斷木。潛而滋齧。有愧容人之量。大乖和衷之誼。持臺諫之公論。釀朋黨之毒流。復社嗣起。而明遂以墟。未始非鄒期楨輯諸賢言行錄之過激而階之厲也。

筆鋒犀利斷制有物

問前明鄒期楨輯東林諸賢言行錄共得十人以何人為最所錄言行能撮舉其要乎

科試無錫縣學一名 楊模

東林諸賢。崛起明季。危言危行。蹈大難不慄。一時閭黨銜之次骨。至編為天鑒同志。點將諸錄。醜詆無遺。點逐殆盡。而明社亦以屋矣。其中多一代鉅儒。而以顧端文高忠憲二公為稱首。高之學尤純焉。端文所著涇皋藏稿中。如小心齋劄記及東林會約商語還經錄證性編數種。皆析理精絕。高子遺書中。如語錄劄記經說諸作。皆力行深至之言。二書皆已重刊行世。其外則有錢啟新薛元臺顧涇凡許靜餘陳筠塘安我素劉本儒華燕超。或抗節明廷。或潛修林野。其隱顯雖不同。尋其情歸。殆無或異。鄒期楨輯東林諸賢言行錄。合為十人。自為之序。復為之贊。而東林之直聲正學。震耀千古矣。忠憲之學。原於端文。晚年益精進止水一殉義不受辱。精忠亮節。上擬古賢。以之俎豆簪宗。殆無愧色。議者顧撫拾細故。摘遺表中。願結來生。及集中釋老。猶不可廢二語。謂其言涉異端。格而不行。百餘年

來無有能繼其請者。然而是非曲直愈久則愈明。其不伸於昔者。未必不伸於今。伏稽

欽定四庫全書總目

稱其學以格物為先。兼取朱陸。特為切實。嚴氣正性。卓然自立。實非標榜門戶之流。

欽定明史本傳。謂其操

履篤實。粹然一出於正。為一時儒者之宗。

御批通鑑輯覽有云。攀龍學本濂洛。涵養邃密。粹然為一代大儒。

聖訓煌煌。後先輝映。洵足以彰直道之公。息羣訟之喙矣。是在居上位之儒者。主持公道。闡發潛光。據義陳

辭。上告我

后。使二百餘年久懸之祀典。補行於今日。則薄海之士。皆當聞風興起。蓋非獨東南人文之幸矣。

推崇忠憲。嚴義甚高。

問賈誼陳政事疏。切中時弊。果一一可見諸施行否。

撰拔陽湖 劉樹屏

賈誼際盛漢之代。抱幽憂之悲。憑弔湘流。自方屈子。夫楚不用屈。而運路漢不用賈。而祚存。似乎長沙左遷。當虛憍

之咎。擬之露均抱石。愆篤恭之忱。不知陳政事疏。多可致用。其欲分王諸國。以殺厥勢也。竟陵氛惡。三烽西騰。幽州

雲深。靖難南下。蕃臣之禍。強則必折。文帝以優容貴漢。顧全國體。卒釀王濞。蔡陽之爭。疲條侯昌邑之壁。則徒蜀不

終。非祇淮南削藩定議。何俟家令乎。其以歲致金。繪匈奴為失計也。戎狄貪憚。胡夷狡橫。非肆鉞撻。誕敢抗凌。然青

病揚威。祈連幕遠。甘陳深計。樓蘭葉懸。綿五年歲。稍藏勲績。而誼稱匈奴之衆。大不過漢一縣。有輕剽之心。垂謀懼

之旨。屬國一役。諒非所任。其以禁踰侈。擇儲傳。禮大臣為切要也。瑋寶燭朗。績穀亂費。非國之富。而民之蠹。棄農逐

利。游屢還虞。漏危既開。泉府日竭。誠宜約以定制。俾無溢分。庶輶車緹帷。不競於道。石山越葛。不張於室。節費靡風。

培養元氣。至若孝景刻深。專尚文法。蒼鷹側目。饑虎攫肉。臨江親曹。尚幽於理。亞夫元功。詔詣廷尉。峭薄性成。酷覈

為治。使文帝早用誼策。慎摧桂宮之賢。幽菟綺里之俊。導洪苞之德。懋純懿之旨。俾景帝漬於寬仁。則中元後元。閒

廩廩馴風矣。國家大體優崇近臣。寵以素茅假之柄。威收助指臂。良用鼓舞。漢初聲威淮陰。今復幽羈絳侯。吏據筆榜。貴近之柄。中朝颺菲薄。故舊之聲。志士聞而不前。寵臣望而寒色。蘭重日鋤。膏明積黜。剝果之存。誰與為理。誼所謂反覆陳誦。維護公忠者也。綜論達事勢。揆幾得理要。原其痛哭流涕太息方之。天問招魂哀郢。同一煩噫之聲。而得宣暢之用。東楚積弱。故不用屈。即運路大漢鼎盛。故不用賈。猶祚存未可伸。漢抑楚亦無容優。屈絀賈已。

據事指論確有所見。文筆亦瑰瑋。律屈迥異恆流。

問露布之名。始於何代。軍旅庶政。厥用或殊。試綜前聞。備詳體要。

選拔山陽 杜秉寅

露布。即古之檄書也。說文曰。檄以木簡為書。長尺二寸。謂之檄。以徵召也。文選六臣註云。檄。皎也。喻彼使皎然。知我情事也。周穆王令蔡公謀父為威猛之辭。以責狄人。此檄書之始。然未有露布之名也。光武紀注。漢制度曰。制詔三公。皆璽封。尚書令印重封。露布州郡。露布之名。實始東漢。然不專屬軍旅所用。可知。漢賈洪為馬超伐。曹操而作露布。虞松從司馬宣王征遼東。及破賊。作露布。隋志有魏武帝露布文九卷。世說云。桓溫北征。令袁宏倚馬作露布。手不輟筆。俄成七紙。通典云。後魏每攻戰。克捷。欲天下聞知。乃書帛。建於漆竿上。名為露布。後魏書曰。邢巒從征漢北。巒後至高祖曰。至此以來。賊未擒滅。所以緩攻者。正待中書作露布耳。北齊書曰。杜弼從高祖及西魏於印山。命為露布。食頃即成。隋文帝開皇中。詔太子庶子撰宣露布禮。及九年平陳。元帥晉王以駟上露布。露布專屬軍旅。用以獻捷。於此為盛。故韓顯宗有高曳長縑。虛張功捷之譏。傳修期有下馬作露布之譽。王肅有獲賊二三。皆為露布之誚。張昌齡以作平龜茲露布為士所稱。于公異以作平朱泚露布為德宗所咨歎。其為捷書之別名何疑焉。至庶政亦有用之者。漢官儀。大司徒布赦令。不用璽封。用露布。後漢書李雲傳。地震裂。眾災頻仍。雲乃露布上書。移副三。

府續漢書禮儀志。請驛馬露布。祭祀志注引東觀書。有司奏孝順號露布奏可。蜀漢建興五年春伐魏。詔丞相某露布天下。魏改元景初。詔司徒露布。咸使聞知。此皆欲四方速知之意。宋書所謂露板馳告。文心雕龍所謂露板不封布諸視聽者也。

引證賅洽筆亦俊爽

問石經漢至宋凡有七刻其建置年月及奏刻監刻繕書姓名能備州舉歟

揚州優生 王虎卿高郵

慨自秦焚六經。聖文埃滅。大義微言。日星海曜。漢氏初立。日不暇給。爰惟孝武始置寫書之官。逮乎孝成乃下求書之詔。向歆父子校篇目於前。劉伏馬班補闕遺於後。於是書乃稍稍出焉。東漢靈帝篤志儒術。首建國學。商定篇簡。而蘭臺漆字。行賂以合私文。尺牘之儒。抗手而談經術。樂賈取識。多引趨勢之徒。陽球上書請罷鴻都之選。陳留蔡邕奏求正定五經文字。下詔許之。其時載籍之光。上薄霄漢。貞石之立下益方聞。論其為功。儼景書契。溯維厥後。續緒有人。事歷千年。石凡六刻。綜夫大略。可得而言。維光和之五年。乃石經之初刻。晉唐所傳。厥目凡五。而當時奏議。乃云六經。既錄論語之文。翻缺詩經之寫。意者伯喈遭禍。輟筆於鉗釵之年。邯鄲補書。樹石於黃初之世。其書碑之姓。氏亦集益於諸儒。中郎本傳列楊馬之六公。隸釋諸書。載左孫之諸氏。冠以陳留。理資讓善。嗣茲再刻。乃逮魏初。江式之表定為邯鄲。衛恆書勢多設疑。故酈氏之注水經。晉史之修恆傳。咸云碑板。非出涑書。溯夫黃初以逮正始。涑雖邁年。世匪百載。或寫於黃初而刻於正始。未可定也。唐之開成。是為三刻。北海勗其議。鄭覃藏其功。校定者四人。題名者十輩。字凡三體。書成三歲。詳定覆校。更繁其徒。下逮偽蜀。校刻尤精。肇始於廣政。告成於皇祐。綜其爵秩。顯晦殊迹。此四刻也。宋之嘉佑。妙選天潢。復令儒臣分書上石。篆隸相間。勒石開封。此五刻也。高宗中興。親揮宸翰。

五經之外。采摭禮記。此六刻也。夫石經之刻。疑議紛如。惟此六朝。足資徵信。雖斷壁之罕存。廢遺闕之足證。王氏伯厚。兼及七家。然若晉之裴頠。雖有刻石寫經之奏。而羯胡構禍。議或阻而未行。宋之南仲。亦有經進石經之辭。而篇翰未彰。事或輟而有待。較諸成就。語難同日。升庵之錄。并列魏唐。乃崔光之請。僅補墜文。天寶之間。橫升月令。一則因而非創。一則駁而不經。未足數也。且夫修學好古。獻王之所服膺。破壞形體。班氏以為深戒。惟漢魏之石經。乃古訓之程式。好事之士。記其殘碑。錄魯詩。則齋韓之說。而毛氏而並存。錄論語。則盍氏之書。為平叔所未采。春秋之學。兼列嚴顏。推之諸經。當同斯例。經師之傳受。以昭經說之異同。以著叩槃視月者。息鄉壁虛造之思。晉古坐雲者。無苟會扁塗之弊。煒哉煌煌。斯為職志。即開成之石刻。譏蕪累於史家。然章句之殊異。資今本之發明。章較足徵神明。自煥孟蜀之刻。尤為精礪。維時偏隅無事。屏主好文。字體清謹。上承貞觀之風。詮斟無訛。遠邁皇祐之世。開封之刻。世當全盛。光堯手蹟。成於兵中。想其遺珉。皆足矜式。乃蔡氏遺迹。如藍之記。已惜其不全。博士之碑。道元所述。已乖於齊史。鄴都之遷。既鈎鉅而析亂。河岸之毀。復崩剝而銷沈。嗜古之士。吁其唏矣。唐之石經。則築城池震壞之也。蜀之石經。則柱礎礮石毀之也。宋皇祐之石經。則徽欽北狩亡之也。惟紹興之刻。尚在杭州。斷圭零璣。彌足寶惜。而愈歎漢魏石經之亡。逸書古記。雍闕不傳。尤可流連痛惜者爾。

援引明確議論博通

江防海防策

觀風松江 姚文枬上海

處今日而談江海。與往代不同。唐以前江面寬四十餘里。隔限南北。非投鞭所能渡。今大江濶處。如橫江采石儀徵京口。江面僅寬六七里。最狹之靖江江陰。寬三里許。一衣帶水。非復天塹之險。而西洋輪船。自狼福山入口。上

溯重慶中間鎮江蕪湖九江漢口宜昌等處。皆設通商埠頭。沿江五千餘里。東西往來。險與敵其論扼守之要。不重南北而重東西。此今昔不同者也。海洋自明中葉泰西各國東來。皆由大西洋繞阿非利加州入葛留巴蘇門答刺之巽地海峽。嗣後蘇爾士河開通。別有小西洋一道。從地中極紅海而來。入麻刺甲海峽。兩海峽乃其來中國第一重門戶。過瓊州七洲洋。有千里石塘萬里長沙。為商北洋界限。其間惟天堂門正島門沙馬崎頭門三處可通出入。此為第二重門戶。關遑層疊。外夷攔入北洋。自非易易。今洋人別開新道。從地球西半面之美國。繞由日本國橫濱長崎而來。正當中國江浙洋面。南洋數重門戶。皆為虛設。所持庫頁島為混同江外蔽。旅順口為牛莊洋河天津外蔽。洋山馬蹟諸山。為長江吳淞外蔽。斤斤然固守近藩而已。此又今昔不同者也。同治初年。曾文正經畫長江水師。鱗次櫛比。節節操防。專建提督以一事權。復分隸沿江督撫以資聯絡。江防要領已極周密。假如四川有警。則扼守夔巫。湖北有警。則扼守武昌。湖南有警。則扼守洞庭。江西有警。則扼守湖口。海洋有警。則扼守崇明福山及江陰圖山等處。無論小醜不足慮。即強敵亦不足憂。所憂者承平日久。則軍政怠弛。是賴有實心任事之大臣。力加振刷以持其後耳。海防之策。亦須仿長江水師體制。聯絡沿海各省水師為一支。特設總督一員以專其責。略分三道。每道各設一提督。燕齊為一道。江浙為一道。閩粵為一道。建造總督行轅於天津上海廣州三處。常年周歷操防。京東萬里足資鎮壓。又須添置鐵甲兵艦。以備出洋之用。或謂兵艦添置後。恐無駕駛舵工。與習於水戰之兵。此則不然。中國出洋民人。在新加坡舊金山等處者。不下十有萬人。其中豈無材略可任。與熟諳海洋事宜之人。破格招徠。所謂重賞之下。必有勇夫者。故蒙意出洋兵弁。求之內地常少。求之外洋必多。習慣使然也。東三省向有混同江綏芬河圖們江三海口。為東北瀕海要地。今自咸豐十年割興凱湖以東地與夷。

三水入海之口。皆為夷有。庫頁一島。亦久淪異域。事皆可惜。混同江西接黑龍江。松花江嫩江。一水可抵伯都訥城。又通內蒙古等處。輪舟駛來。一無阻闕。亦當設水師。雜繁南北。銷鑰東西。又吉林黑龍江境內。可耕之地尚多。如酌移京師八旗兵屯墾。正得古人實塞下之意。則水陸相輔。亦未雨綢繆之要策也。要之諸國通商以後。江海防以外洋為大宗。而控馭外洋。尤以自強為本計。但使政教修明。人才蔚起。則外人懾服。其效自遠。而向所談皆末務。已古人云。天子有道。守在四夷。防云乎哉。

營制之敝。至外海水師極矣。不改絃更張。無以善其後也。分三道建重臣。似屬可行。明胡宗憲以議移總兵屯泊陳錢。今設提督。專制外洋。明非創矣。駕駛之法。習久自精。俄人水戰竊術於荷蘭。中國材士孔多。安在機智不彼若也。謀事在人。得人則興。末段之說。信然。

江防海防策

觀風松江 李鍾珏上海

自泰西人通商以來。江海局面大變。防務亦難言矣。長江向無專防之師。沿江舊營。雖有水師之名。而無礮船。曾自寶之文正奏。設長江水師。定提鎮六標二十四營。上自荊州。下訖海門。大小礮船七百餘號。星羅棋布。千里相接。而下游險要。如鎮江江陰狼山等處。築礮臺。駐重兵。今之江防。不可謂不密矣。然而以禦外寇。則猶有可慮者。江岸通商。近已多至八口。洋人之沂江而上者。輪船可至重慶。其間如漢陽九江蕪湖京口。凡形格勢禁之地。皆為佔據。一旦有事。上游諸險盡失。下游門戶雖固。而敵船之先集各口者。橫衝反擊。豈非腹背受敵之患。此可慮者一也。水師礮船。俱係長龍舳板。長龍設大礮前後左右六位。舳板設大礮前後兩位。左右設車轉小礮兩位。而洋人兵船。每艘大礮多至二十餘位。火器之利。斷不能敵。何論船之大小堅脆不同乎。此可慮者二也。長江東西

數千里輪船併日可至而我上下游消息兼旬難達彼之衝突至捷而我之運掉不靈可慮者三也沿江城邑如江甯安慶武昌等處俱駐重兵難以窺伺然南北口岸繁多假使敵從防兵單薄處乘間登岸徑趨內地其兩湖兩江之騷擾自不待言上而川陝下而齊豫不皆有牽連震動之勢乎此可慮者四也竊謂今日戰守禦之於水不若禦之於陸也出之以正不若出之以奇也設或有變莫若以礮船實內河以水師併陸路補沿江防守之闕厚礮臺退步之兵預設電線以通上下游軍報高壘深溝堅忍持守先為不可勝以待敵之可勝此防江之上策而亦防海所莫外也夫昔人有言謂之江防者必防之於江謂之海防者必防之於海今專守口岸不與前人勿使近岸之旨背乎曰此時勢之不同也前明備倭之策皆在水面以倭寇戰艦不敵火器不備明史所謂長於陸戰短於水關乘其短而禦之故獲全勝今西洋專長戰艦水器中國雖亦製造購買然一切陣法礮法訓練尚未精熟不可輕與之試故以目前時勢衡之無論防江防海皆當於陸地籌戰守不能於水中決勝負也查中國海道大段分三路燕齊為一路吳越為一路閩粵為一路西國之船向由印度洋過新嘉坡而抵澳門香港廈門及東北各口故粵之海南閩之澎湖兩處海道約束實為東南門戶今其兵船半出大西洋入太平洋過日本諸島以至我東北之海而南陽無可扼之險矣大抵敵之來必分擾各口而厚集於天津今大沽礮臺非不鞏固然已逼近神京不若據遠險以控制查登州外連長山島長山之北為磨石侯雞砣磯小欽大欽及北城隍島參差錯落中間海道各不過數里險峭迅激敵船不敢輕入若北城隍島去旅順鐵山頭相隔數十里敵至天津必從此入此處南北對峙天然鎖鑰若於鐵山頭及城隍島添設礮臺居高擊下而於數十里海面中密布水雷又集鐵甲兵船控守登萊各島口連絡燕臺聲勢而通電報於天津則是天津牛莊大清河等口猶處堂奧也東南海

口莫重於吳淞。近邵陽魏氏謂吳淞東南礮臺不近扼內港。遠置於口門之外洋面之衝。樹鵠以招敵。使敵得以活礮攻歟。而我反以歟。擊活船。斯言也。殆有今昔之不同矣。當道光之時。中外交兵。口門外沙尾淺灘尚少。故敵船馳駛如志。我礮十發九虛。今銅沙之尾日見增長。而口外一帶淺灘長互出海。平時載貨之舟往往擱淺。礮船體質沉重。更多窒礙。斷不能如從前之橫恣。近西礮臺已經改作。所列十一門。非復舊時形制。惟聞初落成時。適當丁丑五月大風。沙土鬆動。兼有裂縫。是則堅實與否。固未可知。近又聞東北一帶石塘漸沉。此固大可慮者。若能採魏氏之說。於港內岸狹處增置礮臺。以作退步。庶幾備豫不虞之道歟。其他口岸以目前防務論之。甯波最強固。廣東次之。福州又次之。然皆當以守為戰。不可浪與交鋒。至沿海一帶尤須官築碉樓。民修村堡。團練壯勇。擇候補州縣之有知略者董之。令其各衛地方防守要隘。輔綠營汎兵之不足。杜內地奸宄之潛萌。亦海防者之要務耳。若夫決勝臨機。則在當事者神而明之。而無取乎綺上之談也。

以守為戰。林文忠公亦持此議。然青洲龍穴諸捷。皆邀擊於上海。謂水師可併陸路。然乎未然。訓練尚未精熟。六字自是一篇之眼。趣人謀吳期以十年。今淹歷歲周。不能一試。誰之咎。與水雷之說。乃不得已為之。閱者當分別以觀。幸毋謂得比已足也。此篇與姚生作並成於辛巳之歲。復檢一過。良用慨然。

擬進孫星衍尚書今古文注疏表

科覆蘇州經解二名 曹元弼 吳縣

臣聞疏通知遠。六經莫過於書。固實師承。兩漢始昌其學。日伏勝以授朝錯。則齊魯之際。代有鴻生。迄安國以誨馬遷。則帝皇之紀。世稱雄博。歐陽夏侯之所說。以大傳為宗。衛賈馬鄭之相傳。以壁中為祖。考其時日。則孔後而伏前。稽其名稱。則伏今而孔古。終漢之季。二者並行。自唐臣孔穎達網集諸家。纂成正義。用梅賾之書。凌雜於卷

中析書序之文分冠於篇首既瘳瘳之不免遂話病之相乘伏讀

高宗純皇帝欽定四庫書目採闡若璩

等之言以梅賾古文為偽

璇衡方水準析黍於纖芒

金鏡懸霄燭藏恣於晦影豈直漢皇臨雍之

日博士懃疏魏帝論易之年經生謝陋故山東督糧道臣孫皇衍世家准右值運

天中少踐大科出司監

牧巡風暇日宋登不廢於師傳典郡餘閒周防遂成於雜記篤嗜尚書之訓嘗言孔義未純實則恭繹

皇

言宏鋪

聖指散辭論說搜珍於漢魏之先儒古義陳聞刺秘於書傳之雜注采經子諸編之所引附在序

終參開成石刻之異文表其殊體地與誰某必釋以今名麻憲參詳要符於秦法戒攬枝於偽籍斷徵義於隋唐

用力廿年撰此一集名曰尚書今古文註疏故大學士臣阮元嘗取其書附於經解高相易述未列於學官許商

五行但聞於徒眾今翰林院編修臣王懿榮請與以此書今循誦之本並行荷蒙

聖慈

飭付吏議茲蓋

伏遇

皇帝陛下壹情周孔

仰味庖軒

啟圖六籍之林

勒典三墳之石

未晨詢道勝疑王

國之據

當繕誦經儼駐崆峒之馭矧外史所掌之冊與星辰日月煜耀齊輝而星衍私譔之書在乾隆嘉慶

文明之際仰維

前聖損輕塵隊露之微言亦越儒臣進足嶽添流之鄙臆若毛奇齡王夫之李光地閻若

璩張英朱鶴齡徐文靖胡渭等所治尚書旨非綜輯周祇一端並得上達

九重刊名

四庫納桓榮之講義

當時以為殊恩求園令之遺文儒者驚其盛過臣不度冒昧謹將孫星衍所撰尚書今古文註疏三十卷恭繕一

通進呈

御覽伏望

俯垂矚睇發湛淵珠璧之光

申命度藏列

祕府琳琅之次臣無任悚惕屏

營之至謹奉

表恭進以

聞

欽次如劉子元選詞如楊盈川比事如李義山寢饋於漢魏人文乃有此境若專取唐賢之作句摹而字擬之

必每下愈況矣

擬岳少保謝講和赦表

科取徐州闔屬古學三名 黃以霖宿遷

武勝定國軍節度使開府儀同三司湖北京西宣撫使兼營田大使臣某上表言。今月十二日。准進奏院遞到赦書一道。臣已卽恭率統制領將佐官屬等望闕宣讀訖。薄物細故。棄匈奴之往嫌。躬義履仁。受百蠻之請款。念鋒鏑死亡之慘。為羈縻養之謀。膏澤敷恩。埃壘騰頌。臣某頓首頓首死罪死罪。中謝。竊以大漢和親於冒頓。有唐通幣於吐蕃。皆趾踵未移。盤盂猶熱。俄侵陵於塞下。旋誅求於北庭。蓋狼豕非人。谿壑無底。折矢安足取信。書券惟以我愚。託言於畏罪行成。不過臣下措詞之體。敘勞於唇焦舌敝。又為僉壬請賞之媒。此蓋伏遇皇帝陛下。普覆為心。善征不諛。委蛇制變。斟酌行權。每思屈己以安人。不惜藏瑕而含垢。想諸將皆辭戲下。俾九州重見日中。臣恭際星平親承露渥。昔慙李廣。為武皇伸怒於東轅。今愧臧宮。知世祖稍稽於北狄。尚作憂夫之想。謬懷拓地之心。慮微涓終致江河。將貽毒遠。過蜂螫。臣願整軍於虎豹。誓喋血於燕雲。尚有赤心。甘馬革裹尸之語。終期老眼。看薄陶借卹之年。以太白之天才。橫厲而其擬別賦。恨賦乃至句摹字效。併長短亦不敢少有增減。可知放筆為文。未可盡據為典要也。此作較原文規格。正如唐臨晉帖。不同婢學夫人。至其用意遣詞。尤能傳出少保當日一片忠義之慨。

擬大秦王安敦遣使自日南徼外獻象牙犀角瑇瑁表

觀風松江 李鍾珏

海西國臣安敦稽首頓首謹奉表。大漢皇帝陛下。臣聞百川有朝宗之勢。四裔有享王之義。臣僻處西海。立國數百年矣。側聞大漢德應炎火。祥徵卯金。除暴秦之苛政。啟天下之文明。臣先世數思修貢。輒聞龍堆葱嶺之險。身熱頭痛之阨。又自高皇帝六年。臣國有迦大其之役。越百餘年。兵甲未頓。道路多阻。是以貢獻缺如。孝成皇帝建始三年。